

大般涅槃經後分

唐沙門若那跋陀羅與會寧等譯



清刻龍藏佛說法變相圖

大般涅槃經後分卷上

白七

唐沙門若那跋陀羅與會寧等譯

憍陳如品之末

爾時須跋陀羅從佛聞說大般涅槃甚深妙
法而得法眼見法清淨愛護正法已捨邪見
於佛法中深信堅固即從如來欲求出家佛
言善哉善哉須跋陀羅善來比丘悅可聖心
善入佛道於是須跋陀羅歡喜踊躍欣慶無
量即時鬚髮自落而作沙門法性智水灌注
心源無復縛著漏盡意解得羅漢果須跋陀
羅既證果已即前佛所瞻仰尊顏頭面禮足
偏袒右肩右膝著地長跪合掌悲喜交流深
自悔責在昔罪咎而白佛言世尊恨我毒身
久劫已來常相欺惑令我長沒無明邪見淪
溺三界外道法中痛哉苦哉爲害滋甚今大

喜慶蒙如來恩得入正法世尊智慧大海慈
愍無量竊自惟忖累劫碎軀未能報此須臾
之恩須跋陀羅說是語已悲泣流淚不能自
裁復白佛言世尊我年老邁餘命無幾未脫
衆苦行苦遷逼唯願世尊少住教誡哀愍救
護莫般涅槃爾時世尊默然不許須跋陀羅
不果所請愁憂熱惱高聲唱曰苦哉苦哉世
間空虛世間空虛如何於今大怖即至熱惱
流行哀哉哀哉衆生福盡正慧眼滅復更流
淚悲號哽咽徧體血現發聲大哭於如來前
舉身投地忙亂濁心昏迷悶絕久乃甦醒涕
淚哽咽而白佛言世尊我今不忍見於如來
入般涅槃中心痛切難任裁抑我自何能與
此坏器毒身共住今前寧可先自速滅唯願
世尊後當涅槃爾時須跋陀羅說是語已悲

戀哽咽於是時頃即入涅槃爾時不可說不
可說無數億恒河沙諸大菩薩比丘比丘尼
一切世間天人阿脩羅等同聲唱言苦哉苦
哉如何正覺一旦捨離無主無歸無依無趣
追思戀慕悲感號泣互相執手槌胸悶絕迷
失諸方哀慟白七三千大千世界爾時世尊出八
種聲普告大衆莫大號哭猶如嬰兒各相裁
抑勿自亂心汝等於此行苦生死大海勤修
淨心莫失念慧疾求正智速出諸有三界受
身苦輪無際無明郎主恩愛魔王役使身心
策爲童僕徧緣境界造生死業貪恚狂癡念
念傷害無量劫來常受苦惱何有智者不反
斯源汝等當知我曠劫來已入大寂無陰界
入永斷諸有金剛寶藏常樂我淨我今於此
顯難思議現方便力入大涅槃示同世法欲

令衆生知身如電生戀慕心生死暴河漂流
速疾諸行輪轉法應如是如來涅槃甚深甚
深不可思議乃是諸佛菩薩境界非諸聲聞
緣覺所知佛復告諸大衆是須跋陀羅已曾
供養恒河沙佛於諸佛所深種善根以大願
力常在尼乾外道法中出家修行以方便慧
誘進邪見失道衆生令入正智須跋陀羅乘
本願力今得遇我最後涅槃得聞正法既聞
正法得羅漢果既得果已復入涅槃自我得
道度阿若憍陳如最後涅槃度須跋陀羅吾
事究竟無復施爲設我久住無異今也爾時
世尊說是語已即獻長歎唱言善哉善哉須
跋陀羅爲報佛恩汝等大衆應當供養其屍
安立塔廟爾時大衆惆悵慘結掩淚裁抑即
依佛教以香水酥油茶毗其屍須跋陀羅當

焚屍時即於火中放大光明現十八變身上
出水身下出火右脅出火左脅出水小復現
大大復現小滿虛空中爾時無量大衆及諸
外道邪見衆生發菩提心得入正見須跋陀
羅現神變已還復火中茶毗已訖是時大衆
悲感傷悼收取舍利起塔供養

遺教品第一

爾時佛告阿難普及大衆吾滅度後汝等四
衆當勤護持我大涅槃我於無量萬億阿僧
祇劫修此難得大涅槃法今已顯說汝等當
知此大涅槃乃是十方三世一切諸佛金剛
寶藏常樂我淨周圓無缺一切諸佛於此涅
槃而般涅槃最後究竟理極無遺諸佛於此
放捨身命故名涅槃汝等欲得決定真報佛
恩疾得菩提諸佛摩頂世世所生不失正念

十方諸佛常現其前晝夜守護令一切衆得出世法當勤修習此涅槃典佛復告阿難吾未成佛示入鬱頭藍弗外道法中修學四禪八定受行其教吾成佛來毀訾其法漸漸誘進最後須跋陀羅皆入佛道如來以大智炬燒邪見幢如乾草葉投大火燄阿難今我親戚諸釋種子吾甚憂念我涅槃後汝當精勤以善教誡我諸眷屬授與妙法深心誨誘勿得調戲放逸散心入諸境界受行邪法未脫三界世間痛苦早求出離於此五濁愛欲之中應生憂畏白七無救護想一失人身難可追復畢此一形常須警察無常大鬼情求難脫憐愍衆生莫相殺害乃至蠢動應施無畏身業清淨常生妙土口業清淨離諸過惡莫食肉莫飲酒調伏心蛇令入道果深思行業善惡

之報如影隨形三世因果循環不失此生空過後悔無追涅槃時至示教如是爾時阿難聞佛語已身心顫動情識忙然悲哽咽深沒憂海舉體迷悶昏亂濁心投如來前猶如死人爾時阿泥樓豆安慰阿難輕其愁心而語之言咄哉何爲愁苦如來涅槃時至今日雖有明旦則無汝依我語諮啓如來如是四問佛涅槃後六羣比丘行汙他家惡性車匿云何共住而得示教如來在世以佛爲師世尊滅後以何爲師若佛在世依佛而住如來旣滅依何而住如來滅後結集法藏一切經初安何等語爾時阿難如從夢中聞阿泥樓豆安慰其心令致四問漸得醒悟哀不自勝具陳上問而以白佛佛告阿難何爲憂苦悲哀乃爾諸佛化周施爲已訖法歸是處善哉

白七

五

善哉阿難汝致四問爲最後問大能利益一切世間汝等諦聽善思念之唯然世尊願樂欲聞佛告阿難如汝所問佛涅槃後六羣比丘惡性車匿行汙他家云何共住而得示教阿難車匿比丘其性鄙惡我涅槃後漸當調伏其心柔和捨本惡性阿難我弟難陀具極重欲其性鄙惡如來以善方便示教利喜知其根性以般若慧爲說十二因緣所謂無明緣行行緣識乃至老死憂悲苦惱皆是無明憎愛叢林一切行苦彌滿三界徧流六道大苦根本無明所起以般若慧示以性淨諦觀根本即斷諸有過患無明根本滅故無明滅無明滅則行滅乃至老死憂悲苦惱皆滅得此觀時攝心定住即入三昧以三昧力得入初禪漸漸次第入第四禪繼心正念如是修

習然後自當得證上果離三界苦阿難爾時難陀比丘深生信心依我教法勤心修習不久即得阿羅漢果阿難我涅槃後汝當依我教法正觀教示六羣車匿比丘深心依此清淨正法不久自當得證上果阿難當知皆因無明增長三界生死大樹漂沒愛河衆苦長夜黑暗崖下遶生死柱六識爲枝妄念爲本無明波浪心識策使遊戲六塵種苦惱芽無能制者自在如王是故我言無明即主念念傷害衆生不覺輪轉生死阿難一切衆生爲此無明起諸愛結我見覆蔽八萬四千煩惱即主役使其身身心破裂不得自在阿難無明若滅三界都盡以是因緣名出世人阿難若能諦觀十二因緣究竟無我深入本淨即能遠離三界大火阿難如來是真語者說誠

實言最後付囑汝當修行阿難如汝所問佛去世後以何爲師者阿難尸波羅戒是汝大師依之修行能得出世甚深定慧阿難如汝所問佛涅槃後依何住者阿難依四念處嚴心而住觀身性相同於虛空名身念處觀受不在內外不住中間名受念處觀心但有名字名字性離名心念處觀法不得善法不得不善法名法念處阿難一切行者應當依此四念處住阿難如汝所問如來滅後結集法藏一切經初安何等語者阿難如來滅後結集法藏一切經初當安如是我聞一時佛住某方某處與諸四衆而說是經爾時阿難復白佛言若佛在世若涅槃後有信心檀越以金銀七寶一切樂具奉施如來云何舉置佛告阿難若佛現在所施佛物僧衆應知若佛

滅後一切信心所施佛物應用造佛形像及造佛衣七寶旛蓋買諸香油寶華以供養佛除供養佛餘不得用用者則犯盜佛物罪阿難復白佛言若佛現在若復有人以金銀七寶房舍殿堂妻子奴婢衣服飲食一切樂具^{白七}深心恭敬禮拜供養如來佛涅槃後若復有人以金銀七寶妻妾奴婢衣服飲食一切樂具供養如來形像深心恭敬禮拜供養世尊如是二人深心供養所得福德何者爲多佛告阿難如是二人皆以深心供養所得福德其福無異何以故雖佛滅後法身常存是以深心供養其福正等阿難復白佛言若佛現在若復有人還以深心如上供養恭敬如來佛涅槃後若復有人還以深心如上供養恭敬全身舍利世尊如是二人所得福德何者

爲多佛告阿難如是二人得福正等功德廣大無量無邊乃至畢苦其福不盡阿難復白佛言若佛現在若復有人如上深心一切供養恭敬如來佛涅槃後若復有人如上深心供養恭敬半身舍利世尊如是二人所得福德何者爲多佛告阿難如是二人深心供養得福無異所得福德無量無邊阿難若佛滅後若復有人深心供養如來舍利四分之一八分之一十六分之一百分之一千分之一萬分之一恒河沙分之一乃至如芥子許皆以深心供養恭敬尊重讚歎若佛現在若復有人深心供養恭敬如來如是二人所得福德皆悉無異其福無量不可稱計阿難當知若佛現在若涅槃後若復有人深心恭敬供養禮拜尊重讚歎如是二人所得福德無二

無別佛告阿難及諸大衆我涅槃後天上人間一切衆生得我舍利悲喜交流哀戚欣慶恭敬禮拜深心供養得無量無邊功德阿難若見如來舍利即是見佛見佛即是見法見法即是見僧見僧即是見涅槃阿難當知以是因緣三寶常住無有變易能爲衆生作歸依處阿難復白佛言佛涅槃後一切大衆依何法則茶毗如來而得舍利深心供養佛告阿難我般涅槃汝等大衆當依轉輪聖王荼毗方法阿難復白轉輪聖王荼毗法則其事云何佛告阿難轉輪聖王命終之後經停七日乃入金棺旣入棺已即以微妙香油注滿棺中閉棺令密復經七日從棺中出以諸香水灌洗沐浴旣灌洗已燒衆名香而以供養以兜羅綿徧體觀身然後即以無價上妙白

氎千張次第相重徧纏王身既已纏訖以衆香油滿金棺中聖王之身爾乃入棺密閉棺已載以香木七寶車上其車四面垂諸瓔珞一切寶鉸莊嚴其車無數華幡七寶幢蓋一切妙香一切天樂圍遶供養爾乃純以衆妙香木表裏文飾微妙香油茶毗轉輪聖王之身茶毗已訖收取舍利於都城內四衢道中起七寶塔塔開四門安置舍利一切世間所共瞻仰阿難其轉輪王以少福德紹此王位未脫諸有具足五欲妻妾女惡見三毒一切煩惱諸結使等未斷一毫命終之後世間猶乃如是法則起塔供養一切瞻仰阿難何況如來已於無量無邊無數阿僧祇劫永捨五欲妻妾女於世間法已作霜雹難勤能勤難行能行一切菩薩出世苦行勤苦修習

十方三世一切諸佛所行之道甚深微妙清淨戒定慧解脫解脫知見六波羅蜜無不具足修習如來十力大悲四無所畏三解脫門十八大空六通五眼三十七品十八不共法三十二相八十種好一切諸佛壽命一切淨佛國土一切成就衆生一切難行苦行一切攝善法戒一切攝衆生戒一切攝律儀戒一切功德一切智慧一切莊嚴一切大願一切方便如是等不可思議福德智慧皆已成就無不具足斷除一切不善斷除一切煩惱斷除一切煩惱餘習通達四諦十二因緣於菩提樹降伏四魔成就種智如是妙法悉修習已爾乃一切諸佛唱言善哉善哉同以法性智水灌法身頂乃成阿耨多羅三藐三菩提以是因緣我今號天人師十力種覺至極世

尊天上人間無與等者等視衆生如羅睺羅故名如來應供正徧知明行足善逝世間解無上士調御丈夫天人師佛世尊憐愍世間化緣周畢爲衆生故今入涅槃隨世間法如轉輪王爲令衆生普得供養阿難我入涅槃如轉輪王經停七日乃入金棺以妙香油注滿棺中密蓋棺門其棺四面應以七寶間雜莊嚴一切寶幢香華供養經七日已復出金棺旣出棺已應以一切衆妙香水灌洗沐浴如來之身旣灌洗已以上妙兜羅綿徧體纏身次以微妙無價白氎千張復於綿上纏如來身乃入金棺復以微妙香油盛滿棺中閉棺令密爾乃純以微妙牛頭栴檀沉水一切香木成七寶車一切衆寶以爲莊嚴載以寶棺至茶毗所無數寶幢無數寶蓋無數寶衣

無數天樂無數香華周徧虛空悲哀供養一切天人無數大衆應各以栴檀沉水微妙香油茶毗如來哀號戀慕茶毗已訖天人四衆收舍利盛七寶瓶於其城內四衢道中起七寶塔供養舍利能令衆生得大功德離三有苦至涅槃樂阿難當知一切四衆起佛舍利七寶塔已應當更起三塔供養所謂辟支佛塔阿羅漢塔轉輪王塔爲令世間知歸依故阿難白佛言如來出世悲愍衆生顯示十力大悲四無所畏十二因緣四諦之法三解脱門八種梵音雷震三界五色慈光徧照六道隨順衆生心業所轉或得四果二乘所行或證無漏無爲緣覺之道或入無滅無生菩薩之地或得無量諸陀羅尼或得五眼或得六通或脫三惡或出八難或離人天三界之

苦如來慈力清淨如來解脫法門不可思議
乃至涅槃一切世間人天四衆起七寶塔供
養舍利得大功德能令衆生脫三界苦入正
解脫以是因緣佛般涅槃一切世間人天四
衆報佛甚深無量慈恩起七寶塔供養舍利
理應如是世尊其餘三塔於諸衆生得何等
利而令起立恭敬供養佛告阿難其辟支佛
悟法因緣入深法性已脫諸有一切過患能
爲人天而作福田以是因緣起塔供養所得
福德次於如來能令衆生皆得妙果阿難其
阿羅漢於三界中生分已盡不受後有梵行
已立能爲世間而作福田是故應當起塔供
養所得福德次辟支佛亦令衆生皆得解脫
阿難其轉輪王雖未解脫三界煩惱福德力
故治四天下而以十善化育羣生是諸衆生

之所尊敬以是四衆起塔供養所得福德亦
復無量阿難白佛言佛般涅槃一切四衆當
於何所茶毗如來得收舍利唯願示教佛告
阿難佛般涅槃一切四衆若於拘尸城內茶
毗如來其城中人皆紹王位則相討伐諍訟
無量亦令一切得福階差阿難一切四衆可
於城外茶毗如來爲令世間得福等故阿難
白佛言佛入涅槃茶毗已訖一切四衆收取
舍利安置寶瓶當於何所起七寶塔一切皆
得深心供養唯願示教佛告阿難佛般涅槃
茶毗既訖一切四衆收取舍利置七寶瓶當
於拘尸那伽城內四衢道中起七寶塔高十
三層上有相輪一切妙寶間雜莊嚴一切世
間衆妙華幡而嚴飾之四邊欄楯七寶合成
一切裝鉸靡不周徧其塔四面面開一門層

白七

十二

層間次牕牖相當安置寶瓶如來舍利天人
四衆瞻仰供養阿難其辟支佛塔應十一層
亦以衆寶而嚴飾之阿難阿羅漢塔成以四
層亦以衆寶而嚴飾之阿難其轉輪王塔亦
七寶成無復層級何以故未脫三界諸有苦
故爾時阿泥樓豆白佛言佛涅槃後奈毗已
訖一切天人四部大衆如何分布如來舍利
而得供養爾時佛告阿泥樓豆我般涅槃汝
等天人取佛舍利以平等心分布三界一切
六道世間供養爾時釋提桓因白佛我今從
佛敬請如來半身舍利而我深心願供養故
佛告天帝如來等視衆生如羅睺羅汝不應
請半身舍利何以故平等利祐諸衆生故佛
告天帝我今與汝右邊上頷一牙舍利可於
天上起塔供養能令汝得福德無盡爾時天

人一切大衆悲哀流淚不能自裁爾時世尊
普告四衆佛般涅槃汝等天人莫大愁惱何
以故佛雖涅槃而有舍利常存供養復有無
上法寶修多羅藏毗那耶藏摩達磨藏以是
因緣三寶四諦常住於世能令衆生深心歸
依何以故供養舍利即是佛寶見佛即見法
身見法身即見賢聖見賢聖故即見四諦見
四諦故即見涅槃是故當知三寶常住無有
變易能爲世間作歸依故佛復告諸大衆汝
等莫大愁苦我今於此垂欲涅槃若戒若歸
若常無常三寶四諦六波羅蜜十二因緣有
所疑者當速發問爲究竟問佛涅槃後無復
疑悔三迴告衆爾時四衆憂悲苦惱哽咽流
淚痛切中心追思戀慕愁毒悶絕佛神力故
掩淚寂然無發問者何以故一切四衆已於

戒歸三寶四諦通達曉了無有疑故爾時世尊知諸四衆無復餘疑歎言善哉善哉汝等四衆已能通達三寶四諦無有疑也猶如淨水洗蕩身垢汝等當勤精進早得出離莫生愁惱迷悶亂心爾時世尊於師子座以真金手却身所著僧伽梨衣顯出紫磨黃金師子胃臆普示大衆告言汝等一切天人大衆應當深心看我紫磨黃金色身爾時四衆一切瞻仰大覺世尊真金色身目不暫捨悉皆快樂譬如比丘入第三禪難生是中爾時世尊以黃金身示大衆已即放無量無邊百千萬億大涅槃光普照十方一切世界日月所照無復光明放是光已復告大衆當知如來爲汝等故累劫勤苦截身手足盡修一切難行苦行大悲本願於此五濁成阿耨多羅三藐

三菩提得此金剛不壞紫磨色身具足三十二相八十種好無量光明普照一切見形遇光無不解脫佛復告諸大衆佛出世難如優曇華希有難見汝等大衆最後遇我爲於此身不生空過我以本誓願力生此穢土化緣周畢今欲涅槃汝等以至誠心看我紫磨黃金色身汝當修習如是清淨之業於未來世得此果報爾時世尊如是三反慇懃三告以真金身示諸大衆即從七寶師子大牀上昇虛空高一多羅樹一反告言我欲涅槃汝等大衆看我紫磨黃金色身如是展轉高七多羅樹七反告言我欲涅槃汝等大衆應當深心看我紫磨黃金色身從空中下坐師子牀復告大衆我欲涅槃汝等深心看我紫磨黃金色身爾時世尊從師子牀復昇虛空高一

多羅樹復告大衆我欲涅槃汝等深心看我
紫磨黃金色身如是展轉高七多羅樹七反
告言我欲涅槃汝等大衆看我紫磨黃金色
身從空中下坐師子牀復告大衆我欲涅槃
汝等深心看我紫磨黃金色身爾時世尊從

師子牀復昇虛空高一多羅樹復告大衆我
欲涅槃汝等深心看我紫磨黃金色身如是
展轉高七多羅樹七反告言我欲涅槃汝等
深心看我紫磨黃金色身從空中下坐師子
牀復告大衆我欲涅槃汝等深心看我紫磨

白七

十五

黃金色身爾時世尊顯出如來紫磨黃金色
身普示大衆如三反上昇虛空高七多羅
樹三反從空中下坐師子牀如是慇懃二十
四反告諸大衆我欲涅槃汝等深心看我金
剛堅固不壞紫磨黃金無畏色身如優曇華

難可值遇汝等當知我欲涅槃汝等應當以
至誠心看我紫磨黃金色身如熱渴人遇清
冷水飲之令飽無復餘念汝等大衆亦復如
是我欲涅槃汝等大衆應當深心瞻仰爲是
最後見於如來自此見已無復再覩汝等大
衆瞻仰令足無復後悔佛復告諸大衆我涅
槃後汝諸大衆應廣修行早出三有勿復懈
怠散心放逸爾時一切世界天人四衆遇涅
槃光瞻仰佛者一切三塗八難世間人天所
有煩惱四重五逆極惡罪咎永滅無餘皆得
解脫爾時世尊顯出紫磨黃金色身慇懃相
告示大衆已還舉僧伽梨衣如常所披
應盡還源品第二

佛復告諸大衆我今時至舉身疼痛說是語
已即入初禪以涅槃光徧觀世界入寂滅定

爾時世尊所言未訖即入初禪從初禪出入第二禪從二禪出入第三禪從三禪出入第四禪從四禪出入虛空處從空處出入無邊識處從識處出入不用處從不用出入非想非非想處從非非想出入滅盡定從滅盡定出還入非想非非想處從非非想出入不用處從不用出入無邊識處從識處出入虛空處從空處出入第四禪從四禪出入第三禪從三禪出入第二禪從二禪出入第一禪爾時世尊如是逆順入諸禪已普告大眾我十六以甚深般若徧觀三界一切六道諸山大海大地含生如是一切根本性離畢竟寂滅同虛空相無名無識永斷諸有本來平等無高下想無見無聞無覺無知不可繫縛不可解脫無眾生無壽命不生不起不盡不滅非世間

非非世間涅槃生死皆不可得二際平等諸法故閑居靜住無所施爲究竟安置必不可得從無住法法性施爲斷一切相一無所有法相如是其知是者名出世人是事不知名生死始汝等大眾應斷無明滅生死始爾時世尊說是語已復入超禪從初禪出入第三禪從三禪出入虛空處從虛空出入無所有處從無所有出入滅盡想定從滅盡定出次第還入至非想非非想處從非非想出入無邊識處從識處出入第四禪從四禪出入第二禪從二禪出入於初禪如是逆順入超禪已復告大眾我以摩訶般若徧觀三界有情無情一切人法悉皆究竟無繫縛者無解脫者無主無依不可攝持不出三界不入諸有本來清淨無垢無煩惱與虛空等不平等

非不平等盡諸動念思想心息如是法相名
大涅槃真見此法名為解脫凡夫不知名曰
無明作是語已復入超禪從初禪出乃至入
滅盡定從滅盡出乃至入初禪如是逆順入
超禪已復告大眾我以佛眼徧觀三界一切
諸法無明本際性本解脫於十方求了不能
得根本無故所因枝葉皆悉解脫無明解脫
故乃至老死皆得解脫以是因緣我今安住
常寂滅光名大涅槃爾時阿難無極悲哀憂
愁痛苦心狂忙亂情識昏迷如重醉人都無
知覺不見四衆不知如來已入涅槃為未涅
槃爾時世尊如是三反從超入諸禪定徧觀
法界普為大眾三反說法如來如是展轉二
十七反入諸禪定阿難以不知故佛入一禪
即致一問如是二十七反問阿泥樓豆佛已

涅槃為未涅槃阿泥樓豆深知如來入諸禪
定二十七反皆答阿難佛未涅槃爾時一切
大眾皆悉忙亂都不覺知如來涅槃為未涅
槃爾時世尊三反入諸禪定三反示誨衆已
於七寶牀右脅而卧頭枕北方足指南方面
向西方後背東方其七寶牀微妙瓔珞以為
莊嚴娑羅樹林四雙八隻西方一雙在如來
前東方一雙在如來後北方一雙在佛之首
南方一雙在佛之足爾時世尊娑羅林下寢
卧寶牀於其中夜入第四禪寂然無聲於是
時頃便般涅槃大覺世尊入涅槃已其娑羅
林東西二雙合為一樹南北二雙合為一樹
垂覆寶牀蓋於如來其樹即時慘然變白猶
如白鶴枝葉華果皮幹悉皆爆裂墮落漸漸
枯悴摧折無餘爾時十方無量萬億恒河沙

普佛世界一切大地皆大震動出種種音唱
言苦哉苦哉世界空虛演出無常苦空哀歎
之聲爾時十方世界一切諸山目真隣陀山
摩訶目真隣陀山鐵圍山大鐵圍山諸須彌
山寶山香山金山黑山一切大地所有諸山
一時振裂悉皆崩倒出大音聲振吼世界唱
言苦哉苦哉如何一旦世間孤露慧日滅沒
大涅槃山一切衆生喪真慈父失所敬天無
瞻仰者爾時十方世界一切大海皆悉混濁
沸涌濤波出種種音唱言苦哉苦哉正覺已
滅衆生罪苦長夜久流生死大海迷失正路
何由解脫爾時一切江河溪澗溝壑川流泉
源渠井浴池悉皆傾覆水盡枯涸爾時十方
世界大地虛空寂然大暗日月精光悉無復
照黑暗愁惱彌布世界於是時間忽然黑風

鼓怒驚振吹扇塵沙彌暗世界爾時大地一
切卉木藥草諸樹華果枝葉悉皆摧折碎落
無遺於是時頃十方世界一切諸天徧滿虛
空哀號悲歎震動三千大千世界雨無數百
千種種上妙天香天華徧滿三千大千世界
積高須彌供養如來於上空中復雨無數天
幢天幡天璫珞天軒蓋天寶珠徧滿虛空變
成寶臺四面珠璫七寶鉸絡光明華彩供養
如來於上空中復奏無數微妙天樂鼓吹絃
歌出種種音唱言苦哉苦哉佛已涅槃世界
空虛羣生眼滅煩惱羅刹大欲流行行苦相
續痛輪不息爾時阿難心苦迷悶都不覺知
不識如來已入涅槃未入涅槃唯見非恒境
界復問樓豆佛涅槃耶樓豆答言大覺世尊
已入涅槃爾時阿難聞是語已悶絕躡地猶

如死人寂無氣息冥冥不曉爾時樓豆以清冷水灑阿難面扶之令起以善方便而慰喻之語阿難言哀哉哀哉痛苦奈何奈何莫大愁毒熱惱亂心如來化緣周畢一切人天無能留者苦哉苦哉奈何奈何期今日人天之師爲事究竟無能留者奈何我與汝等且共裁抑復慰喻言阿難佛雖涅槃而有舍利無上法寶常住於世能爲衆生而作歸依我與汝等當勤精進以佛法寶授與衆生令脫衆苦報如來恩爾時阿難聞慰喻已漸得醒悟哽咽流淚悲不自勝其拘尸那城娑羅林間縱廣十二由旬天人大衆皆悉徧滿尖頭針鋒受無量衆間無空缺不相障礙爾時無數億菩薩一切大衆悉皆迷悶昏亂濁心都不覺知如來涅槃及未涅槃唯見非恒變動

一時同問樓豆佛涅槃耶爾時樓豆告諸大衆一切天人大覺世尊已入涅槃爾時無數一切大衆聞是語已一時昏迷悶絕躡地苦毒入心隘聲不出其中或有隨佛滅者或失心者或身心戰掉者或互相執手哽咽流淚者或常椎胸大叫者或舉手拍頭自拔髮者或有唱言痛哉痛哉荼毒苦哉或有唱言如來涅槃一何疾者或有唱言失我所敬天者或有歎言世界空虛衆生眼滅者或有歎言煩惱大鬼已流行者或有歎言衆生善芽種子滅者或有歎言魔王欣慶解甲冑者或自訶責身心無常觀者或有正觀得解脫者或有傷歎無歸依者中有徧體血現流灑地者如是異類殊音一切大衆哀聲普震一切世界爾時娑婆世界主尸棄大梵天王知佛已

入涅槃與諸天衆即從初禪飛空而下舉聲
大哭流淚悲咽投如來前悶絕躃地久乃甦
醒哀不自勝即於佛前以偈悲歎

世尊往昔本誓願 爲我等故居忍土
乃隱無量自在力 貧所樂法度衆生

方便逐宜隨應說 衆生無不受安樂

誘進令出三有苦 究竟皆至涅槃道

如來慈母育衆生 普飲衆生大悲乳

何期一旦忽捨離 人天孤露無所依

痛哉衆生善種芽 無天甘露令增長

善芽漸漸衰滅已 罪業相牽墮惡道

奈何世界悉空虛 衆生正慧眼已滅

既行無明黑暗中 墮落三有淪溺苦

奈何衆生罪無救 願依舍利得解脫

勸請如來大悲力 救護令我脫苦地

何期痛哉此惡世 如來棄我入涅槃
爾時釋提桓因與諸大衆從空而下唱言苦
哉苦哉發聲大哭悲泣流淚投如來前悶絕
躃地久乃甦醒悲哀哽咽胡跪佛前說渴哀
歎

如來歷劫行苦行 普爲我等羣生故

得成無上正覺道 等育衆生如一子

施法藥中爲上藥 療病醫中爲勝醫

大慈悲雲蔭衆生 甘露慧雨雨一切

慧日光照無明暗 無明衆生見聖道

聖月慈光照六趣 三有蒙光脫衆苦

何期於今捨大悲 已入涅槃衆不見

本誓大悲今何在 棄捨衆生如涕唾

我等一切諸衆生 如犢失母必當死

四衆互相執手哭 椎胸大哀動三界

苦哉苦哉諸有人 如何一旦盡孤露
我等福盡苦何甚 善芽焦然無復潤
唯願法寶舍利光 照我今脫三有苦
哀哉痛哉我等衆 幾何重得見如來
爾時樓豆悲哀號泣傷悼無量胡跪佛前以
偈悲歎

正覺法王育我等 飲我法乳長法身
衆生法身未成立 又復慧命少資糧
應以八音常演暢 令衆聞已悉悟道
常放大慈五色光 令衆蒙光皆解脫
如何今已永涅槃 白七 行苦衆生何依趣
苦哉世尊捨大悲 我等孤窮必當死
雖知世尊現方便 我等無能不悲哀
四衆迷悶昏失心 哀動天地震三界
世尊獨處大安樂 衆生大苦欲何之

世尊往昔爲我等 衆劫捨頭截手足
得成無上正覺道 不久住世即涅槃
我及四衆處無明 魔王欣慶捨甲冑
哀哉世尊願大悲 舍利慈光攝我等
伏請世尊愍四衆 法寶流潤願不窮
我等不能即殞滅 苟存餘命能幾何
苦哉痛切難堪忍 重見世尊無復期
爾時阿難悶絕漸醒舉手拍頭椎胸哽咽悲
泣流淚哀不自勝長跪佛前以偈悲歎
我昔與佛誓願力 幸共同生釋種中
如來得成正覺道 我爲侍者二十載
深心敬養情不足 一旦見棄入涅槃
痛哉哀哉荼毒苦 無極長夜痛切心
我身未脫諸有網 無明之殼未出離
世尊慧鬚未啄破 如何見捨疾涅槃

我如初生之嬰兒 失母不久必當死
世尊如何見放捨 獨出三界受安樂
我今懺悔於世尊 侍佛已來二十年
四威儀中多懈惰 不能悅可大聖心
願正覺尊大慈悲 施我甘露令安樂
我願窮盡未來際 常覲世尊爲侍者
唯願世尊大慈光 一切世界攝受我
痛哉痛哉不可說 嗚咽何能陳聖恩
爾時無數億恒河沙菩薩一切世間天人大
衆互相執手悲泣流淚哀不自勝各相裁抑
即皆自辦無數微妙香華曼陀羅華摩訶曼
陀羅華曼殊沙華摩訶曼殊沙華無數天上
人間海岸栴檀沉水百千萬種和香無數香
泥香水寶蓋寶幢寶幡真珠瓔珞徧滿虛空
投如來前悲哀供養爾時拘尸城内男女大

小一切大衆悲哀流淚各辦無數微妙香華
幡蓋等倍勝於前投如來所悲哀供養爾時
四天王與諸天衆悲哀流淚各辦無數香華
一切供養等三倍於前悲泣流淚來詣佛所
投如來前悲哀供養五天如是倍勝於前色
界無色界諸天亦復如是倍勝供養

大般涅槃經後分卷上

音釋

碎蘇內邁切 噉直追切 誘與久切 歛朽居切 悼徒到切
皆將此切 螽尺尹切 顫貌切 戰之膳切 兜羅梵語
也此云細香 觀初觀切 鉸古孝切 慘七感切
花梵當候切 白七

也
爆布校切
剥裂也
茶茶同都切
毒毒苦痛也
沃
穀苦角
切
甯即委
啄竹角切
甯啄也

大般涅槃經後分卷下

白八

唐沙門若那跋陀羅與會寧等譯

機感茶毗品第三

爾時拘尸城內一切男女悲泣流淚不知茶毗法則云何問阿難言如來涅槃如何法則

白八

可以茶毗爾時帝釋具陳上事而以答言如佛所說依輪王法爾時拘尸城內一切人民悲泣流淚總入城中即作金棺七寶莊嚴即辦微妙無價白氎千張無數細軟妙毳羅綿辦無數微妙栴檀沉水百千萬種和香香泥香水一切繒蓋幡華香等如雲徧滿在於空中積高須彌既辦已訖悲哀流淚將至佛所投如來前悲咽不勝而伸供養爾時拘尸城內一切人民及諸大眾重複悲哀哽咽流淚復持無量香華幡蓋一切供具如雲徧滿空

中互相執手槌臂哽咽涕泣盈目哀震大千投如來前悲哀供養爾時大眾悲哽咽深重敬心各以細妙白氎障手扶於如來入金棺中注滿香油棺門即閉爾時拘尸城內一切士女貪福善心總欲攝取如來功德不令天人一切大眾同舉佛棺即共詳議遣四力士壯大無雙脫其所著瓔珞衣服期心請舉如來聖棺欲入城內自伸供養盡其神力都不能勝爾時城內復遣八大力士至聖棺所脫所著衣共擎佛棺皆盡神力都亦不得拘尸城內復遣十六極大力士來至棺所脫所著衣共舉佛棺亦不能勝爾時樓豆語力士言縱使盡城內人男女大小舉如來棺欲入城內亦不能得何況汝等而能勝耶汝等當語大眾及諸天力助汝舉棺乃得入城樓豆

語言未訖爾時帝釋即持微妙大七寶蓋無數香華幡蓋音樂與諸天衆悲泣流淚垂在空中供養聖棺至第六天及色界天皆如帝釋供養聖棺爾時世尊大悲普覆令諸世間得平等心得福無異於娑羅林即自舉棺昇

白八

虛空中高一多羅樹拘尸城內一切人民及諸世間人天大衆等共不得舉佛聖棺爾時帝釋及諸天衆即持七寶大蓋四柱寶臺四面莊嚴七寶瓔珞垂虛空中覆佛聖棺無數香華幢幡瓔珞音樂微妙雜綵空中供養至第六天色界諸天倍前帝釋覆佛聖棺及所供養爾時拘尸城內一切人民見佛聖棺昇在空中槌膺大哭悲咽懊惱爾時一切天人於大聖尊寶棺前路徧散七寶真珠香華瓔珞微妙雜綵繽紛如雲地及虛空悉皆徧滿

哀泣流淚供養如來七寶靈棺同聲唱言苦哉苦哉我等無福舉佛聖棺遂不能得我等孤露何有善根爾時世尊大聖金棺於娑羅林虛空之中徐徐乘空從拘尸城西門而入爾時拘尸城內一切士女無數菩薩聲聞天人大衆地及虛空悉皆徧滿隨從如來大聖靈棺互相執手號聲大哭槌膺叫喚啞咽流淚各持無數香華寶幢幡蓋地及虛空悉皆徧滿悲號哀歎供養靈棺其拘尸那城一面縱廣四十八由旬爾時如來七寶金棺徐徐乘空從拘尸城東門而出乘空右遶入城南門漸漸空行從北門出乘空左遶還從拘尸西門而入如是展轉遶三匝已乘空徐徐還入西門乘空而行從東門出空行左遶入城北門漸漸空行從南門出乘空右遶還入西

白八

三

門如是展轉遶經四市如是左右遶拘尸城經于七市爾時七寶聖棺當入城時一切大衆悲號哽咽各持無數微妙香木栴檀沉水一切寶香文理香潔普薰世界復持無數寶幢幡蓋香華瓔珞至茶毗所悲哀供養爾時四天王及諸天衆悲泣流淚各持天上上妙栴檀沉水表裏香潔芬馥周徧各五百根大如車輪復持一切寶香寶幢寶蓋妙華瓔珞至茶毗所悲哀供養第二天各一千根第三天各二千第四天各三千第五天各四千第六天各五千及幡華至茶毗所悲哀供養爾時色界無色諸天唯有香華至茶毗所悲哀供養爾時一切世間大衆各持微妙栴檀沉水香華幢蓋至茶毗所悲哀供養爾時樓豆涕泣盈目哀悼無極從諸天人乞妙香木栴

檀沉水足六千根文理香潔芬馥周徧至茶毗所悲哀供養阿耨達池四面縱廣二百由旬出四大河佛初成道恒河北岸一樹栴檀隨佛而生大如車輪高七多羅樹香氣普薰供養如來其香樹神與樹俱生常取此香供養於佛佛入涅槃此一檀樹即隨佛滅枝葉俱落神亦隨死有諸異神取此香樹送茶毗所悲哀供養其地乃是三世諸佛茶毗之處大覺世尊乘本願力亦於是處茶毗是處有諸往古諸佛無量寶塔金剛不壞堅固之處爾時如來大聖寶棺漸漸空行至茶毗所徐乘空下安七寶牀其牀一切衆妙瓔珞無價雜綵以爲莊嚴於是時頃復經七日爾時拘尸城內一切士女無數菩薩聲聞三十三天一切大衆悲哀哽咽持諸幡蓋寶幢香華

隨從佛棺經於七日以佛神力一切天人無
飢渴想一無思食唯見哀泣戀慕如來既滿
七日大聖如來將欲出棺爾時拘尸城內一
切士女無數大衆復大哀泣震動世界復持
香華無數幢幡微妙天樂投佛棺前哀咽供
養是時大衆悲哽流淚各以細微白氎自障
其手深重敬心從寶棺中扶於如來紫磨黃
金三十二相八十種好堅固不壞金剛之身
安詳而出置七寶牀爾時大衆重大悲哀聲
震十方普佛世界復持一切香華繒蓋音樂
深心供養悶絕哽咽投如來前是時大衆復
更悲咽盈目流淚各持無數香水香泥深重
敬心從頭至足灌洗如來三十二相八十種
好無量福德智慧莊嚴金剛堅固紫磨黃金
不壞色身復洗寶棺微妙清淨既灌洗已是

白八

五

時大衆復大號哭悲哀哽咽燒微妙寶香散
七寶華無數寶幡幢蓋地及虛空悉皆徧滿
悲哀號泣供養如來是時大衆銜哀喑咽即
持無數妙兜羅綿從頭至足纏裹如來金剛
色身既纏身已復以上妙無價白氎千張於
兜羅上次第相重纏如來身纏身已訖是時
大衆重大悲哀號哭悶絕復持香華幡蓋寶
幢音樂哽咽供養是時大衆哀泣流淚深重
敬心各以白氎障手喑咽悲哽共扶如來入
寶棺中注滿香油棺門尋閉爾時大衆重大
悲哀聲震世界復持香華幡蓋音樂號悼悲
泣供養寶棺爾時一切大衆所集微妙香木
積高須彌芬馥香氣普薰世界相重密次成
大香樓四面七寶莊嚴幢蓋幡華瓔珞雜綵
徧空如雲以爲莊嚴人天音樂悲哀供養是

時天人大衆將欲舉棺置香樓上復大悲哀
槌臂大叫聲震大千復持幢蓋香華音樂悲
哀供養是時大衆哀悼悲結深重敬心各以
白氎障手共舉如來大聖寶棺置於莊嚴妙
香樓上復大號泣絕而復甦唱言苦哉苦哉
何期孤露無有依恃悲咽流淚復散香華寶
幢幡蓋音樂雜綵一切盡心悲哀供養爾時
如來大聖寶棺既上微妙寶香樓已將欲舉
火荼毗如來是時大衆復大號哭驚震大千
復更深重悲哀供養大聖寶棺及妙香樓爾
時一切大衆哀泣盈目各持七寶香炬大如
車輪艷彩光明徧照世界一時大哭荼毗香
樓哀震大千一切世界復以香華徧滿供養
是時寶炬至香樓所自然殄滅是時一切大
衆復持無上七寶大炬燭光普照悲哀流淚

白八

六

投香樓所皆悉殄滅爾時一切海神持海中
火七寶大炬無數光燭投香樓所亦皆殄滅
是時大衆長時號哭一切供養不知如來何
緣未畢投火香樓荼毗不然爾時世尊大悲
普潤待迦葉衆來至乃然時大迦葉與五百
弟子在耆闍崛山去拘尸城五十由旬身心
寂然入于三昧於正受中倏爾心驚舉身顫
慄從定中出見諸山地皆大震動即知如來
已入涅槃告諸弟子我佛大師入般涅槃時
經七日已入棺中苦哉苦哉應當疾往至如
來所恐已荼毗不得見佛三十二相八十種
好真淨色身迦葉以敬佛故不敢飛空往如
來所即將弟子尋路疾行悲哀速往正滿七
日至拘尸城城東路首迦葉遇見一婆羅門
執一天華隨路而來迦葉問言仁者何來答

曰佛般涅槃我於茶毗所來復問此是何華
答言於茶毗所得此天華迦葉就乞答言不
得我期將歸擬示六親家中供養迦葉就借
著其頂上便即悶絕昏迷躋地啞咽悲哽良
久乃甦即自惟忖於此號泣不見如來八十

白八

七

種好紫磨色身無所追憶即與弟子疾共前
進至拘尸城北門而入於其城中入一僧坊
見諸比丘叢聚一處語迦葉言汝等遠來深
勞苦耶安坐待食迦葉答言我之大師已入
涅槃我有何情安此待食諸比丘言汝師是
誰答言汝不知耶哀哉痛苦大覺世尊今已
涅槃比丘聞已各大歡喜而作是言快哉快
哉如來在世禁制我等戒律嚴峻禁戒已應放
堪忍不能依行今已涅槃嚴峻禁戒已應放
捨汝且待食有何急耶佛神力故掩諸天耳

及大迦葉諸弟子等皆悉不聞惡比丘語唯
有迦葉獨自聞之於是迦葉即將弟子悲泣
流淚疾往佛所是時迦葉與諸弟子竊共思
念我等如何得諸供物將至佛所供養如來
迦葉復言我自生長在此城中乞供養物亦
應可得將諸弟子即就城內次第告乞得妙
白氎足滿千張復得無數妙兜羅綿復得無
量寶華香泥香水香油寶幢幡蓋音樂弦歌
瓔珞雜綵悉皆具足迦葉與諸弟子悲哀流
淚即持疾往出城西門爾時迦葉即聞茶毗
之所一切大眾悲咽號哭共問帝釋已供養
訖如何得火然此香樓茶毗如來帝釋答言
人衆且待摩訶迦葉即時而至釋言未訖一
切大眾正於哀中即見迦葉與諸弟子尋路
悲來衆即停哀便爲開路迦葉前進遙見佛

棺將諸弟子一時禮拜號哭哽咽悶絕躡地
昏濁亂心良久乃醒流淚不勝漸漸前行問
大眾言如何得開大聖金棺大眾答言佛入
涅槃已經二七恐有損壞如何得開迦葉答
言如來之身金剛堅固常樂我淨不可沮壞
德香芬馥若旃檀山作是語已涕泗交流至
佛棺所爾時如來大悲平等爲迦葉故棺自
然開白氎千張及兜羅綿皆即解散顯出三
十二相八十種好真金紫磨堅固色身迦葉
與諸弟子見已悶絕躡地哽咽哀哽良久乃
甦涕泣盈目與諸弟子徐上香樓近佛棺邊
復更哽咽號哭悲哽即以所得香華幡蓋寶
幢瓔珞音樂弦歌哀號供養即以香泥香水
灌洗如來金色之身燒香散華哀泣供養灌
洗已訖迦葉與諸弟子持其所得妙兜羅綿

纏於如來紫磨色身次以舊綿纏新綿上兜
羅纏已復以所得白氎千張次第相重於兜
羅上纏如來身纏白氎已復持舊氎著新氎
上次第相纏總纏已訖棺門即閉復以七寶
瓔珞一切莊嚴爾時迦葉復重悲哀與諸弟
子右遶七帀盈目流淚長跪合掌說偈哀歎
苦哉苦哉大聖尊 我今荼毒苦切心
世尊滅度一何速 大悲不能留待我
我於崛山禪定中 徧觀如來悉不見
又觀見佛已涅槃 倏爾心顫大震驚
忽見暗雲徧世間白八 復觀山地大震動
即知如來已涅槃 故我疾來已不見
世尊大悲不普我 令我不見佛涅槃
不蒙一言相教告 我今孤露何所依
世尊我今大痛苦 情亂迷悶昏濁心

我今爲禮世尊頂 爲復哀禮如來曾
爲復敬禮大聖手 爲復悲禮如來腰
爲復敬禮如來臍 爲復深心禮佛足
何苦不見佛涅槃 唯願示我敬禮處
如來在世衆安樂 今入涅槃皆大苦

哀哉哀哉深大苦 大悲示教所禮處

爾時迦葉哽咽悲哀說是偈已世尊大悲即
現二足千輻輪相出於棺外迴示迦葉從千
輻輪放千光明徧照十方一切世界爾時迦
葉與諸弟子見佛足已一時禮拜千輻輪相
即便悶絕昏迷躋地良久乃醒與諸弟子哀
號哽咽右遶七匝遶七匝已復禮佛足悲哀
哭泣聲震世界復更說偈哀歎佛足

如來究竟大悲心 平等慈光無二照
衆生有感無不應 示我二足千輻輪

我今深心歸命禮 千輻輪相二足尊
千輻輪中放千光 徧照十方普佛刹
我今歸依頭面禮 千輻輪相長光照
衆生遇光皆解脫 三塗八難皆離苦
我復歸依頭面禮 輪光普救諸惡趣
世尊往昔無數劫 爲我等故修苦行
今證得此金剛體 足下由放千光明
悲哀稽首歸命禮 安於衆生千輻輪
佛修衆德爲一切 修道樹日降四魔
四魔降已伏外道 衆生因此得正見
稽首歸依頭面禮 衆生正見光明足
佛爲一切真慈父 足光平等度衆生
我復歸依頭面禮 平等離苦輪足光
我遇千輻光明足 悲喜交流哀切心
我復悲哀頭面禮 有感千輻輪光明

稽首歸依輪足光 乘究竟乘出三界
敬禮天人歸依足 輪光普照三有苦
衆生未得脫苦門 皆悉歸命輪光足
我等輪迴未出離 如何輪足見放捨
哀哉哀哉諸衆生 長夜莫覩輪足光

悔過世尊大慈悲 示敬千輻輪光足

哀哉今遇輪光相 自此當何復再覩

爾時迦葉與諸弟子說是偈已復重悶絕昏
迷躋地良久漸醒悲哀哽咽不能自裁大覺
世尊千輻輪相金剛雙足還自入棺封閉如
故爾時城內一切士女天人大衆見大迦葉
復重號哭槌胸大呌哀震大千無量世界各
將所持悲哽供養爾時拘尸城內有四力士
瓔珞嚴身持七寶炬大如車輪燭光普照以
焚香樓茶毗如來炬投香樓自然殄滅迦葉

白八

十一

告言大聖寶棺三界之火所不能燒何況汝
力而能焚耶城內復有八大力士更持七寶
大炬光燭一切將投棺所亦皆殄滅城內復
有十六極大力士各持七寶大炬來投香樓
亦悉殄滅城內復有三十六極大力士各持
七寶大炬來投亦皆殄滅爾時迦葉告諸力
士一切大衆汝等當知縱使一切天人所有
炬火不能茶毗如來寶棺汝等不煩勞苦強
欲爲作爾時城內士女天人大衆復重悲哀
各以所持號泣供養一時禮拜右遶七帀悲
號大哭聲震三千爾時如來以大悲力從心
胷中火踊棺外漸漸茶毗經于七日焚妙香
樓爾乃方盡爾時城內士女天人大衆於七
日間悲號哭泣哀聲不斷各以所持供養不
歇爾時四天王各作是念我以香水注火令

滅急收舍利天上供養作是念已即持七寶金瓶盛滿香水復將須彌四埵四大香潔出甘乳樹樹各千圍高百由旬隨四天王同時而下至茶毗所樹流甘乳王寫香瓶一時注火注已火勢轉高都無滅也爾時海神娑伽羅龍王及江神河神見火不滅各作是念我取香水注火令滅急收舍利往處供養作是念已各持寶瓶盛取無量香水至茶毗所一時注火注已火勢如故都亦不滅爾時樓豆語四天王及海神等汝注香水令火滅者可不欲取舍利還本所居而供養耶答言實爾樓豆語四天王言汝大貪心汝居天上舍利隨汝若在天宮地居之人如何得往而供養耶復語海神汝等住在大海江河如來舍利汝收取者地居之人如何得往而供養耶爾

白八

十二

時四天王即皆懺悔悔已各還天宮爾時大海江河神等皆亦懺悔誠如聖言悔已各還聖軀廓潤品第四
爾時帝釋持七寶瓶及供養具至茶毗所其火一時自然滅盡帝釋即開如來寶棺欲請佛牙樓豆即問汝何爲耶答言欲請佛牙還天供養樓豆言莫輒自取可待大眾爾乃共分釋言佛先與我一牙舍利是以我來火即自滅帝釋說是語已即開寶棺於佛口中右畔上領取牙舍利即還天上起塔供養爾時有二捷疾羅刹隱身隨帝釋後衆皆不見盜取一雙佛牙舍利爾時城內一切士女一切大眾即一時來欲誶舍利樓豆告言大眾當知且待安詳如佛所說應當如法共分供養爾時城內士女一切大眾不聞樓豆所言乃

各執持矛稍弓箭刀劍胷索一切戰具各自莊嚴欲取舍利爾時城內人衆即開佛棺兜羅白氎宛然不燒大衆見已復大號哭流淚盈目各將所持悲哀供養深心禮拜流淚長跪同說偈讚

白八

如來以大自在力

於一切世得自在

十三

大悲本願處斯土

周旋苦海度衆生

無量智慧神通力

出沒生死無罣礙

能以一身爲多身

多身一身爲無量

神變普應咸皆見

無緣即現入涅槃

我等福盡無應緣

故乃如來見放捨

佛於娑羅寶棺中

大力士舉皆不起

大悲之力自輕舉

昇空高一多羅樹

乘虛徐遶拘尸城

七日大聖遶七市

遶已自臨茶毗所

不共神力所施爲

一切天人莫能測 佛於大般涅槃中

金剛不壞力自在 一切茶毗火不然

自於心中出慈火 焚燒七日示現盡

天人不能滅此火 如來大悲示應力

帝釋來至火便滅 妙兜羅綿纏佛身

大火焚燒都不然 白氎隨佛寶棺內

火中儼然而不燒 方知如來自在力

於法自在爲法王 敬禮大悲三界尊

敬禮聖中無畏者 敬禮普覆大慈力

敬禮神變自在者 我等從今離世尊

沒苦無能見救護 哀哉哀哉大聖尊

方今長別何由見

爾時大衆說是偈已重復悲泣各以所持盡

哀供養爾時樓豆普爲天人一切大衆與城

內人共於棺所徐舉白氎及兜羅綿其迦葉

等白氎千張火全不燒其城內人白氎千張
除外一雙餘者灰燼其兜羅綿宛然如故爾
時樓豆取此白氎及兜羅綿細破分之與諸
大衆令起寶塔而供養之樓豆復取氎灰亦
細分衆令起寶塔而供養之其餘燼灰無復

白八

十四

得分衆各自取起塔供養其城內人先已遣
匠造八金壇八師子座各以七寶而爲莊嚴
其七寶壇各受一斛各置七寶師子座上其
八師子七寶之座座別各有三十二力士各
嚴七寶瓔珞雜綵纏身共舉七寶八師子座
座上復各有八姝女身嚴七寶瓔珞雜綵持
七寶壇座上復各有八姝女嚴身瓔珞執七
寶蓋覆金壇上座上復各有八姝女身嚴瓔
珞持七寶劔衛七寶壇座上復各有八姝女
身嚴瓔珞執雉毛纛豎壇四面座別各有無

量人衆持妙音樂幢幡寶蓋華香瓔珞圍遶
供養座各復有無量人衆各持弓箭矛稍眉
索長鉤一切戰具而圍遶之從拘尸城前後
圍遶向茶毗所其八師子七寶之座出城去
後城內人衆即持無數香泥香水尋力士後
平治塗地作香泥路廣博嚴事向茶毗所其
路兩邊無數寶幢幡蓋香華眞珠瓔珞衆妙
雜綵音樂弦歌嚴飾路邊儼然奉待大聖世
尊舍利而還其諸力士持八師子七寶之座
圍遶至茶毗所即大哀泣號哭哽咽聲震大
千各以所持深心供養爾時世尊大悲力故
白八
碎金剛體成末舍利唯留四牙不可沮壞爾
時大衆既見舍利復重悲哀以其所持流淚
供養爾時樓豆與城內人涕泣盈目收取舍
利著師子座七寶壇中滿八金壇舍利便盡

十五

爾時一切天人大衆見佛舍利入金壇中重更悲哭泣流淚各將所持深心供養爾時城內諸大力士及諸士女將欲持佛舍利金壇向拘尸城爾時大衆復重悲哀各將所持流淚供養爾時城內諸大力士及圍遶衆并城內人悲咽流淚舉八師子七寶之座隨香泥路迴向拘尸爾時一切天人大衆復大悲哀聲震世界各將所持隨從舍利哀號供養如來舍利至城內已置四衢道中爾時拘尸城人即嚴四兵無數軍衆身著甲鎧各執戰具遶拘尸城四面周匝無數重兵儼然而住擬防外人來抄掠故雖爲儀式無戰爭心復有五百大呪術師守城四門爲遮難故復有無數寶幢幡蓋微妙莊嚴大雉毛熏於城四維儼然供養爲標式故爾時城內一切士女

天人大衆復大悲哀各將所持深心供養其舍利壇置師子座經于七日於七日中一切大衆日夜悲號哀聲不斷盡以所持深心供養其八師子七寶之座各有五百大呪術師各共持之遮有天龍夜叉神鬼來欺奪故經七日間爾時如來本生眷屬迦毗羅國王諸釋種等佛神力故都不覺知佛入涅槃佛涅槃後經三七日爾乃方知時彼國王諸釋種等悲哭號泣即共疾來至拘尸城見諸兵衆無數千人圍遶城外復見寶幢幡蓋列城四維映發國界復見大呪術師守城四門王及釋等問呪師言佛涅槃耶答云佛涅槃來過四七日茶毗已竟將分舍利王言我等是佛所生眷屬佛神力故令我不知如來涅槃我今欲見如來舍利卿可開路令我得入呪師

兵衆聞是語已即聽入城王及釋種得入城已見佛舍利在師子座悲號哽咽涕淚交流右遶七帀遶七帀已拭淚而言我今欲請如來舍利一分將還供養大衆答言雖知汝是釋種眷屬然佛世尊先已有言分布舍利未見及汝各有請主汝如何得汝可還邪爾時王及釋種不果所請號哭悲哀悶絕躡地良久乃醒悲不自勝語衆人言如來世尊是我釋種愍汝等故於此涅槃汝等如何見有欺忽不分我一分舍利作是語訖各禮舍利右遶七帀悲泣流淚心生忿恨慨悼還家爾時摩迦陀主阿闍世王害父王已深生悔恨身生惡瘡旣遇世尊月愛光觸身瘡漸愈來詣佛所求哀懺悔世尊大悲即以甘露微妙法藥洗蕩身瘡極重罪滅即還本宮都不覺知

白八

十七

如來涅槃於涅槃夜夢見月落日從地出星宿雲雨繽紛而隕復有煙氣從地而出見七彗星現於天上復夢天上有大火聚徧空熾然一時墮地夢已尋覺心大驚顫即召諸臣具陳斯夢此何祥耶臣答王言是佛涅槃不祥之相佛滅度後三界衆生六道有識煩惱橫起故現大火從天落地佛入滅度月愛慈光慧雲普潤悉皆滅沒即夢月落星落地者佛涅槃後八萬律儀一切戒法衆生違反不依佛教乃行邪法墮於地獄日出地者佛涅槃後三塗惡道苦聚日光出現世間故感斯夢王聞是語將諸臣從夜半即來至拘尸城見諸無數四兵之衆防衛拘尸無量重數復見城門有呪術師防止外難王見是已即問呪師佛涅槃耶呪師答言佛涅槃來已經四

七當今大衆將分舍利王言佛入涅槃我都
不知我於夜夢見不祥事以問諸臣方知如
來入大涅槃我欲入城禮拜如來金剛舍利
汝爲通路呪師聞已即聽前入王至城內四
衢道中見師子座舍利金壘復觀大衆悲哀
供養王與從衆一時禮拜悲泣流淚右遶七
帀哀慘供養爾時王就大衆請求如來一分
舍利還國供養大衆答言何晚至耶佛已先
說分布方法舍利皆已各有所請無有仁分
仁可還宮阿闍世王不果所請愁憂不樂即
禮舍利惆悵而還爾時毗離外道名王佛涅
槃後經三七已爾乃方知即將臣從疾往拘
尸旣至拘尸即見無數四兵之衆防衛拘尸
遶無量重爾時阿勒伽羅王佛涅槃後經三
七已爾乃方知即將臣從疾往拘尸旣至拘

白八

十八

尸即見無數四兵之衆防衛拘尸遶無量重
爾時毗耨國不畏王佛入涅槃經三七已爾
乃方知爾時遮羅迦羅國王佛入涅槃經三
七已爾乃方知爾時師伽那王佛入涅槃經
三七已爾乃方知爾時波肩羅外道名王佛
入涅槃經三七已爾乃方知即將臣從疾往
拘尸旣至拘尸即見無數四兵之衆防衛拘
尸遶無量重復見城門有大呪師防止外難
王問呪師佛涅槃耶答言佛涅槃來已經四
七當今大衆將分舍利王語呪師佛入涅槃
我都不知故今晚至我欲入城禮拜供養如
來舍利汝可開路呪師聞王即聽前入至四
衢道見師子座七寶莊嚴安置舍利七寶金
壘復見大衆悲哀供養王將徒衆一時禮拜
悲哀流淚右遶七帀各齎所持悽慘供養王

語衆言佛入涅槃我都不知一何苦哉不得見佛請衆與我一分舍利還國供養衆言汝何來晚佛已先說分布法軌舍利皆已各有所請無有仁分仁可還官王及臣衆不果所請愁憂不樂即禮舍利悲戀而還爾時迦毗

白八

十九

羅等七國王臣不果所願心懷悲憤慨戀而還各至本邑咸遣使臣同詣拘尸再求舍利城人報曰世尊慈父旣於我界而般涅槃全身舍利應留永劫於此供養終不分與外邑諸人諸國答曰若分者善若不與者我等當以彊力奪取城人告曰徒事鬭諍終不可得闍王復使兩行大臣馳兵請分告城人曰若與者善若不見分我加兵力彊奪將去答言任意爾時拘尸城中所有壯士男女並閑弓射即便總出嚴整四兵欲與諸邑交兵合戰

爾時毗離國諸黎車種遂集四兵往拘尸城在一面住阿勒國諸刹帝利亦集四兵在一面住毗耨國諸婆羅門亦集四兵在一面住遮羅迦羅國諸釋子亦集四兵在一面住師伽國拘樓羅亦集四兵在一面住波肩羅國力士亦集四兵往拘尸城在一面住爾時拘尸那城七軍圍遶爲舍利故各欲奪取爾時大衆中有一婆羅門姓煙在八軍中高聲大唱拘尸城諸力士主聽佛無量劫積善修忍諸君亦常聞讚忍法今日何可於佛滅後爲舍利故起兵相奪諸君當知此非敬事舍利現在但當分作八分諸力士言敬如來議爾時姓煙婆羅門即分舍利以爲八分作八分竟高聲大唱汝諸力士主聽盛舍利瓶請以見與欲還頭那羅聚落起瓶塔華香幡蓋妓

樂供養諸力士答言敬從來請爾時必波延
那婆羅門居士復以高聲大唱拘尸城中諸
力士主聽燒佛處炭與我欲還本國起炭塔
華香妓樂供養諸力士答婆羅門言敬從來
請爾時拘尸城諸力士得第一分舍利即於
國中起塔華香妓樂種種供養波肩羅婆國
力士得第二分舍利還歸起塔種種供養師
伽那婆國拘樓羅衆得第三分舍利還歸起
塔種種供養阿勒遮國諸刹帝利得第四分
舍利還國起塔供養毗耨國諸婆羅門得第
五分舍利還國起塔種種供養毗離國諸梨
車得第六分舍利還國起塔種種供養遮羅
迦羅國諸釋子得第七分舍利還國起塔華
香供養摩伽陀主阿闍世王得第八分舍利
還王舍城起塔華香妓樂種種供養姓煙婆

羅門得盛舍利瓶還頭那羅聚落起塔華香
供養必波羅延那婆羅門居士得炭還國起
塔供養爾時閻浮提中八舍利塔第九瓶塔
第十炭塔如是分布舍利事已時諸菩薩及
聲聞衆天人龍鬼國王長者大臣人民一切
大衆悲號涕泣裋胷大哭五體投地作禮而
去

大般涅槃經後分卷下

音釋

白八

王

毳徒協切細
毛布也
懊惱懊鳥暗切惱奴暗於
切極也芬馥切芬馥文切馥房六
無聲也芬馥切芬馥香氣也馥素姑切
生殄徒典切憫余廉切慄力質切涕泗
也殄絕也憫火餓也慄懼也涕泗他
計切泗臍祖奚切輻方六燼徐刃切壘徒舍
音四臍切輻切燼火餘也壘切

屬抄楚教切掠也 竊徒到切 豎羽立臣庚切 鎧苦也切 抄掠
沒于敏切 禁妖祥遂切 憤懣房也切 慨感苦蓋切 隕